

Sinar Harian 3/2/2019 m/s 38



Nelayan yang hadir pada Program Pengukuhan, Penerangan dan Mesyuarat Agung My Komuniti Perikanan.

## *Nelayan diminta manfaat peruntukan*

**PASIR PUTEH** - Nelayan di negeri ini diminta memanfaatkan peruntukan Kerajaan Pusat dan negeri berjumlah RM100,000 tahun ini bagi meningkatkan ekonomi mereka.

Pengarah Jabatan Perikanan Negeri Kelantan, Nazri Ishak berkata, bantuan kerajaan itu dalam bentuk peralatan menangkap ikan selain membantu nelayan mengusahakan Industri kecil dan sederhana (IKS).

Katanya, jabatan juga membantu mempromosikan produk yang dihasilkan nelayan menerusi program My Komuniti Perikanan (My KP).

"Peruntukan itu hampir sama dengan peruntukan sepanjang tahun lepas di mana ramai nelayan mendapat manfaat daripadanya," katanya.

Beliau berkata demikian pada Program

Pengukuhan, Penerangan dan Mesyuarat Agung My Komuniti Perikanan di Kampung Tok Ajam di sini, kelmarin.

Program itu dirasmikan Pengerusi Jawatankuasa Pertanian, Industri Asas Tani, Bioteknologi, Teknologi Hijau dan Alam Sekitar, Tuan Mohd Saripudin Tuan Ismail.

Nazri berkata, peluang meningkatkan ekonomi terbuka luas kepada komuniti nelayan negeri ini.

"Tidak terbatas kepada penghasilan produk berasaskan hasil laut sahaja, nelayan boleh mengusahakan apa sahaja projek bagi meningkatkan pendapatan.

"Nelayan juga boleh mengusahakan projek ekonomi secara berkelompok jika tidak mampu melaksanakannya secara sendiri," katanya.